



Sulinermik inuussutissarsiuteqartut sulinerup nalaani ullormut minuttini 30-ni timigissarsinnaatitaalissappata tamatuma namminersorlutik inuussutissarsiuteqartunut pisortanullu aningaasatigut allaffissornikkullu kingunerisassaanik misissuinermik aallartitsinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermi taamatuttaaq tamatuma innuttaasut peqqissusiannut kingunerisassai taamatullu aamma inooriaatsimik pissuteqartumik nappaatit appariarnissaasa naatsorsuutigineqartup malitsigisaanik napparsimalluni sulinngitsoortarnerit Peqqinnissaqarfimmullu aningaasartuutit ikinnerulernerisa inuiaqatigiit aningaasaqarniarnerannut sunniutissai qulaajarneqassapput. Misissuineq UKA 2025 nallertinnagu Inatsisartunut agguanneqassaaq.

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Piffissaq sapaatip akunneranut nalinginnaasumik suliffiusartoq ullumikkut nalunaaquttap akunneri 40-sunit 35-inut appartinneqarpata, tamatuma aningaasatigut, inuiaqatigiinnut peqqissutsikkullu kingunerisassaanik misissueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuineq UPA 2025 nallertinnagu Inatsisartunut agguanneqassaaq.

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Qujanaq Demokraatit Inatsisartuni ilaasortaatitaannut Anna Wangenheim-imut siunnersuutitut pitsaasunut soqutigintunullu.

Demokraatini siunnersuutit nuannaarutiguaannarpagut eqqarsartaatsinut sungiusimasatsinnit unammilligassartallit. Sungiusimavarput, sapaatip akunneranut 40 tiimit sulisoqartarnera, sungiusimavarpullu, suligaanni, pingaarnertut allamik sunnani sulisoqassasoq.

Qanormitaavami issangaluarpa eqaannerusumik aqqissuussigaluarutta, sulisitsisumut sulisartumullu nuannaarutaasussamik? Qanorli naammassisinnaasat allannngornagit, sapaatip akunneranut tiimini ikinnerni sulisalerutta, eqaannerusumik sulinerup malitsigisaanik? Qanorli napparsimaneq pissutigalugu sulinngitsoornerit apparpata, suliffiup nalaani timigissarnissamut periarfissinneqarnermi? Imaluunniit napparsimaneq pissutigalugu sulinngitsoornerit apparpata, tiimini ikinnerusuni sulisalerneq pissutigalugu? Qanorli suliffik ilaqutariinnerlu ataqatigiinnerulerualuarpata, sapaatip akunneranut ilaquttat ilagalugit tiimini pingasunik imaluunniit tallimanik amerlanerusunik sulinngiffeqartaleraluarutta?

Apeqqutit taakku tamarmik pitsaasuupput, naleqquttuullutik soqutiginarlutillu, inuiaqatigiittut aqqissuussaansinnut, suliffitsinnut ilaqutariittullu inuunitsinnut. Ineriartussagutta, ileqqugut sungiutiinnarsimasagut kipitittariaqarpagut allanillu eqqarsalerluta. Paasisariaqalerparput qanoq illluta



ulluinnarni inuunerput pitsaanerusumut allanngortissanerlugu.

Eqqarsaasersuutiguaannarnikuuara, Danmarkimi sulisartut Kalaallit Nunaannut naleqqiullugu sapaatip akunneranut sulisarnerat sivikinnerusq. Sooruna taamaattoq? Ilumut taamaattuaannassava?

Nalunngilara, imaariataarsinnaasoq, sulisussameerneramik unamminartoqartitsilersinnaanerput. Kikkut tiimini, amigaatigineqartunimi sulissappat? Aappaatigulli sulinermi piffissap sivikillinera qanorluunniit kinguneqartussaavoq, nungullariartorneq assersuutigalugu timi atorlugu sulinermi piffissaq sivittorpat apparsimasinnaasoq.

Suliffiup nalaani timigissarnermut tunngatillugu, pitsaaquteqartoq arlalinnik takusinnaavara. Timigissarnek timillu atornera eqqummaarinnerulertillutit, eqqaamallaqqinnerulersillutik aamma nutaaliorsinnaassuseqarnerulersissavaatit. Taakkununga pissutaavoq, timigissarnerup tarnik uippakajaarnermik, ilikkarsinnaassutsimik, eqqaamallaqqinnermik, nutaaliorsinnaaneramik, ukkatarinnissinnaaneramik silassorinnermillu aqutsinera annertusartarmagu. Taakkulumi tamarmik tassa, suliniarnitsinnut naammassisaqarsinnaanitsinnullu isumaqaqaat, sulinitsinni.

Saniatigullu iluaqutaasorujussuusussaq unaasoq tassaavoq, ullormut timigissarnerup kingunerissammagu inooriaatsimik peqquteqartumik nappaatissaraluit pinaveersaartinneqassammata, napparsimaneq pissutigalugu sulinngitsoornernik apparsaallunilu siunissami peqqinnissaqarfimmi aningaasartuutinik apparsaasussaq.

Demokraatini isumaqarluinnarpugut, pissutissaqartoq misissuinerit aallartinnissaanut, ukunani siunnersuutini Inatsisartunut ilaasortamit Anna Wangenheim-imit siunnersuutigineqartutut.

Siunnersuutit marluk tamaasa akuereqqullugit innersuunneqarput ataatsimiititaliamilu susassaqartumi suliarisassanngorlugit innersuunneqarlutik.